

**Uunga siunnersuut: Naartunermi, erninermi meeravissartaarnermilu
sulinnigiffeqartarneq pillugu Inatsisartut inatsisaat nr. xx, xx. xxx 2020-imeersoq
Isumaginninnermut, Ilaqutariinnermut Inatsisinillu Atuutsitsinnermut Naalakkersuisumit
saqqummiunneqartoq**

pillugu

Ilaqutariinnermut Peqqissutsimullu Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Ataatsimiititaliap suliarinninnermini uku ilaasortarai:

Inatsisartunut ilaasortaq Malene Vahl Rasmussen, Demokraatit, siulittaasoq
Inatsisartunut ilaasortaq Mikivsuk Thomassen, Inuit Ataqaatigiit, siulittaasup tullia
Inatsisartunut ilaasortaq Anders Olsen, Siumut
Inatsisartunut ilaasortaq Nikkulaat Jeremiassen, Siumut
Inatsisartunut ilaasortaq Bo Martinsen, Demokraatit
Inatsisartunut ilaasortaq Peter Olsen, sinniisoq, Inuit Ataqaatigiit
Inatsisartunut ilaasortaq Stine Egede, Inuit Ataqaatigiit

UKA2020-imi oktoberip aallaqqaataani siullermeerinninnerup kingorna siunnersuut
ataatsimiititaliap misissorpaa.

1. Siunnersuutip imarisaa siunertaalu

Naartunermi, erninermi meeravissartaarnermilu sulinnigiffeqarnerup pitsanngorsaatinik
aralalinnik siunnersuut imaqarpoq. Kalaallit Nunaanni najugaqartut meerartaartut tamarnik
ernillutik meerartaarsimaneri meeravissartaarsimanersulluunniit apeqqutaatinnagu
sullinniarneqartut siunnersuummi tamarnik pineqarput, taamatuttaaq inuit meeqqamik
paarisassaminnik tiguisut pillugit aalajangersakkanik siunnersuut aamma imaqarpoq.
Siunnersuutip imarisarivai: sulisitsisunut namminersortunut meerartaarnermut atatillugu
sulinnigiffeqarnermut aningaasaateqarfimmik pilersitsinissamik (naartusut erninissaminnut
sapaatit akunneri sisamangoraangata sulinnigifeqarsinnaatitaalernissaat), angajoqqaat
meeqqaminnik annaasaqartut toqusoqartillugu sulinnigifeqarsinnaatitaanermut periarfissaat
pitsanngorsarneqarnissaannik, anaanangortussat nakorsap naliligaanik pissuteqartumik
allamut erniartornissaminnik innersuunneqartunut ulluni aallarfirminninngaanniit

peqanngissinnaatitaalernissaannik, ilaqtariit isertitakitsut nutaamik naatsorsueriaaseqarlernikkut pitsaanerusementik aningaasatigut atugassaqartinneqalernissaannik, sapaatillu akunneri kingulliit sisamat angajoqqaat sulinngiffeqartarnerat eqaannerulersinneqarnissaannik, taamaaliornikkut angajoqqaat namminneerlutik piffissap kingulliup qanoq agguataarneqarnissaa pilersaarusiorsinnaalernissaannik.

2. Siunnersuutip Inatsisartunit siullermeerneqarnera

Siunnersuut partiinit tamanit tapersorsorneqarpoq immikkoortorlu ataatsimiititaliami suliarineqartussanngorlugu innersuunneqarluni. Savaatillit imaluunniit aalisartut/piniartut nuliaat/aapparisaat isertitaqarsimanermut takussutisiisinnaangitsunut atugassaritaasut pitsanngorsaavigineqarnissaat oqallinnermi partiinit arlalinnit oqaatigineqarpoq.

3. Tusarniaanermut akissuteqaat

Tusarniaanermut akissutigineqartut inatsisissatut siunnersuummut ilanngunneqarpoq, taamaalilluni Inatsisartut Siulittaasoqarfiata iluserisassatut piumasaqaataanut naapertuulluni.

Inatsisissatut siunnersuut marloriarlugu tusarniaassutigineqarsimanera ataatsimiititaliamit naammagisimaarlugu maluginiarneqarpoq, tusarniaanermi siullermi tusarniaanermi akissutigineqartut sukkasuumik ilanngunneqarsimapput, inatsisissatut siunnersuummi malunnaatilimmik allannguinermik kinguneqartumik kingornalu tusarniaassutigeqqinneqarluni. Sukumiisumik suliarineqarneranik tusarniaanermilu akissutigineqartut ilanngunneqarnerinik tamanna qulakkeerinneqataavoq inatsisissatullu siunnersuutip pitsaassusaanut qaffassaataalluni.

4. Saaffiginnissutit

Ataatsimiititaliami suliarineqarnissaa sioqqullugu Ilaqtariinnermut Peqqissutsimullu Ataatsimiititaliaq inatsisissatut siunnersuut pillugu Isumaginninnermut, Ilaqtariinnermut Inatsisinillu Atuutsitsinnermut Naalakkersuisoqarfimmut paasissutissiiviusumik saqqummiussinissamut qaaqquneqarpoq.

5. Ataatsimiititaliap siunnersuummik suliarinninnera

Arnanut najugaqarfiginngisaminniittut sulinngiffeqarsinnaanera siunnersuummi pitsanngoriaataasoq ataatsimiititaliap maluginiarpaq, ilanngullugulu naartunermut erninermullu atatillugu sulinngiffeqarsinnaatitaanermut tunngatillugu arnat nunap immikkoortuini naligiinnginnerat eqqarsaatigalugu alloriarnerujussuusoq nalilerlugu. Sulisussaaleqineq pissutigalugu erniartortarfiit arlaqartut ajoraluartumik matuneqarsinnaaneri aarlerinartorsiortillugit tamanna qulakkiissallugu pingaaruteqartoq ataatsimiititaliap naliliivoq.

Inuit meerallit tamarmik “anaanaaqataanerat”, ataataaneq imaluunniit anaanaaneq, tassa angajoqqaat suaiaqatigiinnginnerat imaluunniit angajoqqaajusut tamarmik arnaannaanerat

apeqqutaatinneqarani inatsisissatut siunnersuummi pingaartinneqarsimasoq ataatsimiititaliaq naliliivoq. Angajoqqaajusut angutaannaasimappata pisinnaatitaaffii malittarisassani suli ajornartorsiutaasoq ataatsimiititaliamit maluginiarneqarpoq.

Meeqqap inuunermik pitsaasumik aallartinnissaanut angajoqqaanngortussat tamarmik atugaasa inatsisissatut siunnersuut saqqummiunneqartoq malunnaatilimmik pitsanngoriaataassasoq naggataatigut ataatsimiititaliamit oqaatigineqassaaq, ataatsimiititaliallu naliliinera naapertorlugu qulakkeerneqarnissaa pingaarnepaavoq. Arnat assersuutigalugu ilaqtariit savaatillit- aamma aalisartut/piniartut isertitaasa naatsorsuutaannik takutitaqarsinnaanngitsut siunissami aaqqiiffigineqarnissaat siunertaralugu ataatsimiititaliamit Naalakkersuisunut kaammattuutigineqassaaq.

Meeqqat tamarmik inuunerminnik pitsaasumik aallartiffeqartariaqartut ataatsimiititaliaq pingaartillugu isumaqarpoq, tamannalu tamakkiisumik isigaluni suliniuteqarnermi pitsaasumik ilaqtariinnut politikkeqarnikkut ikorfartorneqartariaqartoq.

6. Ataatsimiititaliap inassuteqaatai

- Ataatsimiititaliap isumaqatigiittup siunnersuut akuerineqassasoq inassutigaa

Inatsisissatut siunnersuut ataatsimiititaliap pitsaasutut isumaqarfigaa, aalisartunulli/piniartunulli savaatilinnullu tunngatillugu ajornartorsiutit isumaliutissiisummi taaneqartut eqqumaffigeqqullugit.

Taamatut oqaaseqarluni isumaliutissiisummilu allassimasutut paasinnilluni matumuuna siunnersuut ataatsimiititaliap aappassaaniigassanngortippaa.



Malene Vahl Ramussen
Formand



Mikivsuk Thomassen
Næstformand



Anders Olsen



Stine Egede



Nikkulaat Jeremiassen



Bo Martinsen



Peter Olsen, suppleant